

## **EDU-UWEM MME ANDITIENE-CHRIST**

**Ñwed Mbon Rome 12:1-21; 2 Peter 1:5-11**

**QYQHỌ UKPEP-ÑKPỌ 357**

**Eke Mkparawa**

**IKỌ IBUOT: “Esua se idiokde; eyire se ifonde” (Ñwed Mbon Rome 12:9).**

### **Edisana**

Jesus okobon akam abana mbet ye kpukpru mmọ eke editienede Enye. Enye ebeñe nte mmọ ekpedide kiet, ediana kiet ye eken ye Abasi nde. Enye ebeñe ete enam mmọ esana. Edinam asana oworo ndikabare ndi edisana, ediyet nsio ke idiok-ñkpọ. Eda edinam asana edomo ye eriwuberede oduñ eto. Erinyaña etie ukem ukem nte emi esibede eto eduok edi etak eto oro ekeme nditibe onyūn otōn ntak okori. Ke edinam asana ke ewuberede mme oduñ efep.

Jesus ama obon akam nte mbet Esie ekpenamde akpanikọ, mmọ ñko ekpenyūn esonọ eda ye Abasi ke ererimbot emi idomo ye ukut edude. (Kot ke John 17:15-21).

Edinam-asana anam owo Abasi otim osonọ ke erikan idiok-ñkpọ. Edi “uduak Abasi, ete mbufo ikpekabare esana” (1 Ñwed Thessalonica 4:3). Ikot Christ eyom ndidu uwem nte ekemde ye uduak Abasi, ntre ke mmọ eyak uwem mmọ enọ Abasi enyūn ebōn akam tutu Abasi eyet mmọ esana. Mme ñkpọ efen edu emi owo Abasi ekemede ndinam man oto do enye anam akpanikọ onọ Abasi, ke ndinam uduak Esie, ye ke ndinam utom nnọ Enye. Owo Abasi ananam utom ke ukpono Abasi esie, ododomo kpukpru ini ndikabare mbiet Ete ufok esie.

### **Uwut-Ñkpọ**

Ke ini Paul ewetde onọ esok ufok Abasi ke Rome, enye etiñ abana mme ñkpọ emi ekpeñwamde mmọ ndidi nti mme anditiene-Christ. Mme ñkpọ emi edi se ekemede ndikot mme utom mme anditiene-Christ. Mmọ edi uwut-ñkpọ ke edu uwem anditiene-Christ. Ke ini owo enyenede ima Abasi ke esit esie enye eyekut nte ke ndidu uwem emi asanade edi eti ifet. Enye oyom ndidu uwem nnyūn nem Abasi esit, ndien ke erinam ntem, enye ofiok ete ke imọ imodu ke mbeñidem inọ Heaven.

Ndusuk ndito-ñwōn ekop ete ndibuana ke ndusuk mbre, mme ndika ndusuk ebiet, mme ndibre mbre ye ndusuk ndito-owōn eken, esiwak ndinam mmọ eduk ke mfina. Nte ikpefonde ndidianade ñkpōn mme ñkpọ oro ye mme mmọ oro eke edade mfina edi? Ntem ke edi ye owo Abasi: ke ndiwōnre ñkpōn idiok-ñkpọ, ye ndibōn akam nnyūn ndu uwem nnọ Abasi, eñwam enye ndibohọ mfina.

### **Odu-uwem Uwa**

Paul ekpe ye Ikot Abasi ndiyak uwem mmọ nnọ Abasi, ndinyūn nda ikpohidem mmọ nte “odu-uwem uwa” nnọ Abasi. Ke eset mme owo ekepono Abasi oto ediwot mme unam nda nam uwa, edi mfin emi Abasi oyom nnyin ikpono inyūn itoro Enye ke edidu uwem nnọ Enye. Isaiah, anditiñ ntiñ-nnim ikọ okodohọ ete: “Koro obio ekpo midikomke fi, mkpa midinyūn itoro ke fi: ... odu-uwem, idem odu-uwem eyekom fi, kpa nte ami nnamde mfin” (Isaiah 38:18, 19).

Uwa edi ñkpọ oro eke enode, esana eyak ofuri-ofuri, enyūn eyak kpukpru enọ Abasi. Owo ndida ikpohidem ye uwem esie nte “odu-uwem uwa” nnọ Abasi edi ndiyak uwem esie ofuri-ofuri nnọ Abasi ye uduak Esie. Abasi iyomke odu-uwem uwa ikpōn-ikpōn edi oyom enye emi asanade, emi ama okobohọ ke idiok-ñkpọ.

### **Odudu**

Didie ke afo ekeme ndidu mbohọ idiok-ñkpọ? “Ke ndikabare ndi obufa ke esit fo.” Paul etiñ ukem ikọ emi ke akam emi enye obonide abana ufok Abasi ke Ephesus: akpakam ada Spirit Esie anam mbufo esonọ idem enyene odudu ke ukpōn; ... man mbufo eyohọ esim ofuri uyohọ Abasi” (Ñwed Mbon Ephesus 3:15-19). Oto ke eribōn akam kpukpru usen-ubok mbemiso ufok-ñwed, mbre ye utom, ye ke erikot Ñwed Abasi mme ndikpañ utōn ke ini ekotde, ndito ekeme ndinyene Obon ndidu ye mmọ, ntre Enye eyewut mmọ ndinam se ifonde ndinyūn ndu uwem nnọ Enye. Edikpep Ikọ Abasi ke Usen Obon ndinyūn ñkpep mme ikọ ibuot eyeñwam ndidemere esit nnyin nnyūn nsōn nnyin ke Obon.

## **Nte Anamde Ye Mmọ Eñwen**

Anditiene Ọbọñ edi owo nsuhoridem ebem kaña iso ekere abaña mmọ eñwen onyũ ekere abaña idem esie ke ukperedem. Emi eyewut ke edu uwem esie ke usen ke usen. Ekeme ndinọ fi ndimek ke otu apple iba, emi kiet okponde akan eken. Satan eyetiñ ke utọñ fo ete afo ekpenyene ndida enye oro okponde akan koro biọñ ọdọñde fi. Edi afo eyeti ete ke Jesus iyomke nnyin idi ibuk, ana nte ibem kaña iso ikere ibaña mmọ eñwen, ntre afo enyene, nte ido edide, ndikpọñ apple oro okponde akan nnọ eyenọwọñ enye eken. Oro edi usuñ kiet ndiwut ima “ndinyuñ ñkpono kiet eken,” idighe ndikere mbaña idem nnyin nkan nte akpanade edi.

## **Eti Mme Idiọk**

“Esua se idiọkde; eyire se ifonde.” Anditiene-Christ اساسا onyũ ofume mme ñkpọ eke edide idiọk. Enye amama onyũ eyire mme ñkpọ emi efonde. Ekpededi ke edibre mbre, eyenọwọñ emi amade Abasi eyedianare idem esie ọkpọñ mme ñkpọ eke idiọkde. Enye ikpanaha odomo ke ido mbre nte eyipde inọ mme nte ewotde owo. Enye inyeneke ndikpebe mmọ oro eke eñwọñde sika mme mmọ oro eyetde ñkpọ ke idem mmọ, okposuk edide mbiet sika mme ñkpọ uyet-inua ke ido mbre. Eyenọwọñ emi edide anditiene-Christ inaha ama idiọk-ñkpọ emi odude ke uwem mme mmọ oro eyipde enyuñ etukde mme owo. Satan enyene usun eke adade oduri mme owo ndikere nte ke idiọk-ñkpọ “isuk idiọkke ikagha,” ndien sun-suñ enye odomo mmọ ndinam ndibe-ndibe mme ñkpọ oro mifonke. Paul ọdọhọ ete, “Esin idem ekere ndinam ido eke enyenede ukpono ke enyin kpukpru owo.” Okposuk nte mmọ eñwen miduhe uwem nte enemde Abasi esit, oro inọhọ nnyin unen ndinam ñkpọ kiet emi akpayatde Abasi esit.

## **Eti Ke Itie Idiọk**

Utu ke ndida idiọk nsio usiene idiọk, anditiene-Christ ada eti edinam akan idiọk ubọk. Enye ọfọfọn ido ye mme mmọ emi idiọkde ido ye enye. Enye inyeneke spirit usio usiene. Enye ekpekpeme ifet esie ndinam eti ñkpọ nnọ mme mmọ oro enamde enye idiọk. Ke Ñwed Mme Ñke nnyin imokot eñwọñde emi enyenede mmọ emi efonde ido ye mmọ eke enamde mmọ idiọk. “Edieke biọñ ọdọñde usua fo, nọ enye udia adia; edieke itọñ onyũ asatde, nọ enye mmọñ ọñwọñ: koro afo eyebok enye mbubek ikañ ke ibuo: ndien Jehovah eyenọ fi usiene” (Mme Ñke 25:21, 22). Nte oro ọwọrọ ete ana nnyin ifon ido ye mmọ emi esakde nnyin nsahi? Ih, ọwọrọ ntre. “Ediọñ mmọ emi enamde mbufo isin-enyin.”

## **Ñkọri**

Nnyin ndidu uwem nnọ Abasi edi uwa emi odotde ndinọ Enye. Abasi iyomke ñkpọ ito ikọt Esie ikan se mmọ ekemede ndinam. Abasi iyomke ñkpọ ito ikọt Esie ikpọñ edi Enye enyene ñko mme uñwam ọnọ mmọ. Ke uñwam emi Enye ọnọde ikọt Esie ekọrọ ima Abasi, mfon, mbuotidem, idorenyin, odudu ye ime. Mme ñkpọ emi enyene nnyin, ndien ibọ mmọ ito ke akam ye ke ikọ Abasi, oro edi Ñwed Abasi. Owo ikemeke ndisim idaha emi Abasi oyomde ke uñwam Abasi miduhe.

Ke akpa ini emi owo ọbọde erinyaña enye enyene mme mfon owo Abasi emi ke ekpri udomo. Abasi oyom nnyin ikọri ke mme ñkpọ emi. Ke 2 Peter 1:5-11 esọñọ nnyin idem ndikọri nnyuñ ndian ke udomo eke nnyin inyenede, man nnyin ikukpu Abasi. Peter ama ewet ọnọ nnyin ete “etie ke mfon, ye ke ifiọk Ọbọñ ye Andinyaña nnyin Jesus Christ ekọri ñkọri” man nnyin ididuo ikpọñ nsọñọ-nda ye mbuotidem (2 Peter 3:18).

Ke ini eyen-ọwọñ mikọrike iwọrọ uniọñ minyuñ inyeneke udobi, nnyin idiọñọ ite ke mfina odu: enye ikopke nsọñidem nte akpanade edi; eyen oro eyekpa ibọhọke enye ọbọ uñwam. Ntem ke edi ye owo Abasi. Ñkpọ afina edieke enye mikọrike. Enye iduhe ke nsọñidem ke spirit. Utọ itie emi eyeda ọkọsuñọ ke mkpa ibọhọke enye eseme okot Abasi oyom uñwam.

Anditiene-Christ odu uwem ọnọ Ọbọñ kpukpru usen. Nditene Ọbọñ ke Usen-Ọbọñ ikpọñ-ikpọñ me ndinyuñ nam eti ñkpọ ke ini ke ini ikemke. Ke ukpep-ñkpọ emi otode ke mme ñwed emi Paul ye Peter ewetde, nnyin imekppep ibaña mme nti ñkpọ emi owo Abasi anade nte anam. Owo inamke mme ñkpọ emi man enye ekpedi owo Abasi. Enye anam mmọ koro enye edide owo Abasi. Kpukpru ini enye okokut ntak ndinem Abasi esit ye ndinyuñ nnam uduak Esie. Ndien Ọbọñ ye ofuri ererimbot eyediọñ, oto ke uwem esie, ete ke enye edi anditiene-Christ.

## **MME MBUME**

1. Anie ekewet N̄wed Mbon Rome?
2. Ekewet enye enọ anie?
3. Didie ke owo ekeme ndidi odu-uwem uwa nnọ Abasi?
4. Nso iñwam owo ndinam akpanikọ nnyuñ mbuotidem ye Abasi?
5. Nso ke owo ekeme ndinam ke usen ke usen man enye okop odudu ke spirit?
6. Didie ke owo ekeme ndifiok edieke owo edide anditiene-Christ?
7. Didie ke anditiene-Christ okut mme n̄kpọ eke edide idiok?
8. Didie ke anditiene-Christ anam ye mmọ emi ediokde ye enye?
9. Nso ke edinam-asana anam ke uwem owo?
10. Nso ke ndikọri ke mfọn ọwọrọ?